

तुबारि संपादकीय
टीम

◆अस इ उम्मिद करुं लगो से कि एण बाड़े रोज अन्तर सुआ मेहणु इस कम अन्तर सहयोग कते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पढ़ू जे इ पत्रिका शुरु किओ असी।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कहेण जे नेई छपाण लगो। अगर कोइ ई सोचता बि त अस जिम्मेवार नेई।

◆छपाणे पेहले सोब आर्टिकल दुई टाई पांगेई मेहणु हरालो असे। इ त खुलि बोक असी कि पेहली वार पांगवाडी लिखणे सुआ मुशकिल भुन्ती त गलती बि भुन्ती। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल ना मिले, या घाटि मेहणु के मदद ना मिले त तुबारि पत्रिका कदि बि बंद भुई सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड केन्द्रीय पुस्तकालय, त बजार राबे ठेके भेएडे हरिरामे दुकान अन्तर तुबारि ड्रॉप बॉक्स पुठ बि अपुं सुझाव त आर्टिकलस रखुं जे सुविधा किओ असी।

◆अस सोबी पांगेई मेहणु जे हात जोड कइ निवेदन कते कि, तुस बि कोई अच्छा आर्टिकल, पुराणी या नोवी कथा, कहावत, कविता, त नोवे घीत (पंगवाडी अन्तर) लिख कइ छपां जे हेन्न दिए।

तुबारि संपादकीय टीम

☎ 9418431531

☎ 9418429574

☎ 9418329200

☎ 9418411199

☎ 9418904168


☎ 9418721336



तीखी पिपी

बबोता, गां चौकी

यक जंगल अन्तर दुई टींझि थी। से दुहे जुंटे थी। यक नउ चुनी त यक नउ मुनी थियु। चुनी शांत स्भावे थी मुनी ती उधमि त बोकियारी थी। मुनी कसे जोई मिल-जुल कइ ना बिशतीथ त लेहर बि तेस झठ एई घेन्तीथ। से केसे जे बि प्यार जोई ना बोतीथ। मुनी हमेशा सोभि जे ई-ई बोतीथ कि जंगले सोभि जीव तसे नउ तीखी पिपी रख छऊं। सोभि जंगले जीवी चुनी त मुनी जुंटे भेणी के नउ तेन्के स्भाव हेर कइ रखो थिए। मुनी जे सोब जेई तीखी पिपी बोतेथ त चुनी जे मीठि मिसरि बोतेथ। दुहि अपु-अपु नउए पता थिया। पर मुनी तीखी पिपीए स्वादे पताई ना थिया।



यक रोज दुहे भेण दुकानदारे स्टोर अन्तर गई। तठि हछे-हछे त नीके-नीके सुआ टुकडू झड़ो थिए। सुआ टुकडू हेर कइ चुनी त मुनी तेन्हि बेढण लगी। जिखेई चुनी यक टुकडू टाण लगी त तसे मुंह पुठ मुठू ई भु त तेस तसे स्वाद अब्बल लगा। तोउं दुकानदार अपु नौखर जे बोलुण लगा, 'तु कपले बि कोई कम हेर कइ ना कता। तेई अत सोब मिसरी टुकडु फटाई छओ असे। अब भी झड़ कइ ए सोब बेकार भोई गो। अन्हि खरेई लाइ कइ यक कुणे कइ छइ। तउं जंगले जीव त टींझि एई कइ खाइ छती। दुकानदारे बोक शुण कइ नौखरे खरेई लाई कइ मिसरी टुकडु यक कुणे कइ छडे। चुनी त मुनी जोई होरि सुआ टींझि ऐइ कइ मिसरि खाण लगी। तोउं चुनी त मुनी सेहली मिनि बोलु, चुनी तउ जे मिसरी तउं बोते किस कि तु सोभि जे परेम जोइ त मिसरि ई मीठि बोक कती।' मिनि बोक शुण कइ मुनी बोलु, 'होर तीखी पिपी कीं भुन्ती? असी तसे स्वादे पता त चलियाल। सोभ जेई मोउं जे तीखी पिपी बोते।' मठणी मुनी भओड़ि बोके शुण कइ मिनि हसते-हसते बोलुण लगी, 'मुनीए! तीखी पिपी अगर तोउ जोई छुई बि घिएल त तें बुरा हाल भोई घेन्ता। चल फिर बि तें तीखी पिपी हेरणे मन कियो असा त दुकान अन्तर घेन्ते। तठि कोठि ना कोठि तीखी पिपी बि रखो भोल।' मुनी तीखी पिपी हेरणे अतो चाह थि कि तेन धिक भइ बि सवर ना किया। चुनी तेस समझाण बि लगो थी पर मुनी कोठि कसेरी मनतीथ।



मुनी सधे दुकान अन्तर घुस गई। तसे पता-पता चुनी त मिनि बि दुकान अन्तर घेण अऊ। से टाहो जेई अपेफ बुच बोक करण लगो थी कि अभेई दुकान पुठ कऊ पिपी खरीदणे जे बि नेई अओ। तउं से टाहो जेई घेणेवाडी थी कि यक ग्राहक एई कइ तीखी पिपी मगण लगा। दुकानदारे अपु नौखर जे बोलु, 'असे धे स्टोर केआं यक पऊ तीखी पिपी दे।' नौखरे स्टोर खोला त मुनी झठ स्टोर अन्तर घेई गई। तोउं तसे पता

-पता चुनी त मिनि बि गई। नौखर पिपी लफाफे अन्तर छण लगो थिया त यक दुई पिपीए शुंग भी झड़ गई। पिपीए शुंग हेर कइ मुनी झठ तसे भेइ पुज गई। पर इ कि शरीर पुठ धिक भइ पिपी लगणे बेलि मुनी बुरे हाल भोई गो। से तीं तड़फण लगी। चुनी त मिनि तसे हाल हेर कइ डर गई त झठ तेस बाहर घिन एई। बाहर तेन्हि तसे पुठे पुओणी फटओ।

पर तेस हउ बि तीं पिपी लगे थी। से रोलते-रोलते बोलुण लगी, 'ओहो, तीखी पिपी त तीं कुस्तरी भुन्ती। तेन त में पूरे शरीर पुठ जी आग लाई छड़ी। कि अउं बि ईं असी ना? ना, ना अउं ना चाहांती कि सोब जेईं मोउं जे बि तीखी पिपी बोले'। अउं बि चुनि ईं मीठि मिसरी इ बणण चाहती। इढ़िया पता अउं कदि बि कैसे जोई ना झगड़ींती ना कैसे जे जवाब देन्ती त ना कैसे जोई बतमीजी बोक कती। अब मोउं पता लग गा कि मिठास त परेम सोभि के जीवन अगर बढांता।' तसे बोक शुण कइ चुनी तसे मगरी पुठ हथ रख कइ बोलु, 'मुनीए तु ठीक बोलुण लगे असी फिर हे टींझि के स्वाभवे असा मठे कना जे रिझेईणे। अस टींझि आटि अन्तर हमेशा मीठि चीज हेरती त मठे कना जे घेन्ती त तीखी पिपी असी कदि बि रिझाई ना बटती। तोउं त असी अपु स्वभाव त कमे लिए मिठेईं बणुण चाहिए।' मुनी बोलु, 'आं चुनी, इढ़िया पता अउं कैसे शिकेत करणे मौका ना देन्ती होर ना कैसे जे लेहरी-लेहरी कइ बोक कती।' तसे बोक शुण कइ चुनी त मिनि तसे मुंह पुठ हथ रख कइ बोलुण लगी, 'वाह...ईं भुईं ना तीखी पिपीए.....ना ना मीठि मिसरी बाड़ी बोक।' तदिया पता टाहो जेईं हसण लगी त यकेकी हथ टइ कइ अपु गी जे घेई गई।

जिमदार त आधिबाड़े कथा

Anonymous



यक जिमदार थिआ। तेन यक सेउए बगिंचा ला त तसे चहरो कनाह बाड़ दिता। तेन तथ पेहरा देण बाड़ी जे बिशुण जे जगाह बि बणाई। पता तेन से बगिंचा आधी पुठ कैसे मेहणु धे दिता त से दूर देश घेई बसा। जपल सेउ उणुणे टेम आ त तेन अपु यक नौखर लंघा कि अपु आधी घिन आई। जपल से नौखर तेन्हि आधीबाड़ी केई पुजा त बोलु 'मालिके अपु आधी मागो असी।' त तेन्हि मेहणु मी कइ से नौखर मइडा त बगैर आधी वापिस लंघाई छड़ा। पता तेन जिमदारे होरे नौखर बी तठि लंघा पर तेन्हि मेहणु कोउं माइडे, कोउं कुटे त कोउं कोउं मार छड़े। जिमदार स्यापा भोई गा। से दूर थिआ त तस सुआ कम बि थिउ। त तेन सोचु 'चल अउं अपु कुआ लंघान्ता। से में कुआ हेर डरते त आधी दी छते।'

पर जपल तस जिमदार कुआ तेन्हि मेहणु केई पुजा त तेन्हि मेहणु सोचु 'ए त मालिक भो। चले अस मारते त सोब जिम अपु नाओ कते।' त से सोब मी कइ तस जिमदारे कुआ बगिंचा केआं डीड कइ बाहर नेन्ते त तठि मार छते।

तोउं जपल से जिमदार इ खबर शुणता त से तेन्हि मेहणु जोई की कता? से तेन्हि मेहणु भयकर सज्जा देन्ता त तेन्हि केआं से अपु बगिंचा नी कइ कैसे होरे मेहणु धे देन्ता जे सुसुर काम कते त ठीक टेम पुठ तस आधी देन्ते।



ई अपु कुआ जे

बबीता चौकी

नलेखिया पढ़ी दे! तैई आज तकर कोई बि बुक नेई खोलो।



की ना ईया। अउं त रोज फेसबुक खोलता।

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574



एडस बीमारी इन्सान जोई यक लिंगि सम्बन्ध बणाणे बोलि कैसे बी एडस एईं घेन्ता... काँडोम सिर्फ 18% सुरक्षा कता एडस मेहणु के जिसम अन्तर कम से कम 7 केआं 10 साल तकर कोई लक्षण नजर न एन्ते।